

欽
定
全
唐
文

欽定全唐文卷三百八十七目錄

獨孤及

四

奉送元城主簿兄赴任序

送廣陵許戶曹充召募判官赴淮南序

仲春裴胄先宅宴集聯句賦詩序

鄭縣劉少府兄宅月夜登臺宴集序

華山黃神谷醺臨汝裴明府序

建丑月十五日虎邱山夜宴序

冬夜裴員外薛侍御置酒宴集序

送宇文協律赴西江序

送賀若員外巡按畢歸朝序

送長洲劉少府貶南巴使牒留洪州序

送王判官赴福州序

送薛處士業游廬山序

送韋員外充副元帥判官之東都序

送孫侍御赴鳳翔幕府序

清明日司封元員外宅登臺設宴集序

送澤州李使君兼侍御史充澤潞陳鄭節度副使

赴本道序

送兵部梁郎中上奏事既畢還幕府序

送成都成少尹赴蜀序

送吏部杜郎中兵部楊郎中入蜀序

送商州鄭司馬之任序

送洪州李別駕還任序

送韋司直還福州序

送潁州李使君赴任序

送屯田李員外充宣慰判官赴河北序

送歸中丞使新羅弔祭冊立序

送渭南劉少府執經赴東都覲省序

送餘杭薛郡守入朝序

崔中丞城南池送徐侍郎還京序

送蔣員外奏事畢還揚州序

晚秋陪盧侍御游石橋序

欽定全唐文卷三百八十七

獨孤及

四

奉送元城主簿兄赴任序

往歲兄之尉匡德刑成禮義舉牾政杜紊綱緝人曰莅民
如此其達必大十四年春王正月再命於元城元城地雄
人悍土壤賦錯處宋衛中山燕齊趙魏之都會三川輻湊
四術轂擊兄方以德舉吏此大邦則千里之迹兆於是矣
彼徒勞者其騫翥之濫觴乎歲物已春泰山日綠亦旣選
吉駕言徂東豈不知常棣之詩廢則和樂之好缺盍使伯

金定全集卷三十一
氏仲氏偕詠歌之以贈行邁

送廣陵許戶曹充召募判官赴淮南序

冉駝不庭三年矣王師戒嚴將問罪荒服於是上將分職
慎選乃僚以許公有持斧舊名斷犀餘地故授以戎政俾
發卒於東夫三河之人豪全齊之人武荆吳之人悍藉其
餘勇可以盡敵信以致之緊公是賴然則諭王命敦師律
度程以料民徵騎以濟眾歌事以遣役輯謀以定功在是
行乎高天晚秋殺氣動地靡靡歧路悠悠旆旌送離如之
何賦小戎以爲好

仲春裴冑先宅宴集聯句賦詩序

先是先清明一日右金吾倉曹薛華陳嘉肴醢清酤會河東裴冀滎陽鄭裒河南獨孤及於署之公堂引滿舉白自午及子促席於花陰賦詩於月波樂極不醉夜艾而罷後清明三日二三子春服成思欲修好尋盟選勝卜晝裴侯是以再有投轄之會是會也鄭不至吾兄惠然而來堂有琴庭有篠芳草數步落花滿席中和子冠烏紗帽相與箕踞盟噉傲睨相視稱觴乎其間趣在酒中判爲酩酊之客家本秦也能無嗚嗚之聲其詩云上天垂光兮熙予以青

金史卷之二十一
卷三十一
二
春今日何日兮共此良辰與君觥濁酒而藉落英兮如年
華之相親蹇淹留以醉止孰云含意而未申歌數闋裴側
弁慢罵曰百年懽會鮮於別離開口大笑幾日及此日新
無已今又成昔不紀而賦之如春風何其演爲連珠以志
此會

鄭縣劉少府兄宅月夜登臺宴集序

夏五月小暑至矣吾兄方幙夜天掃月榭有酒如乳醑我
乎城隅城臨近山俯瞰平隰秦郊漢苑相錯如繡且有顯
氣足以娛人故數君子稱觴焉其誰同之有若功曹隴西

李華參軍滎陽鄭洵瑯琊王休河東裴貺鄭尉京兆韋造
皆卿材也聲同而形骸相忘道契故機事不入是以有高
會遠望危言浩歌或心慚清機寓興於物或語及陳迹肝
衡而笑於是初筵而惠好修中飲而意氣接旣醉而是非
遣夫彭澤採菊隱侯臨風謂之盛矣况高城古臺深夜朗
月芳樽良友佳景勝事今夕何夕八者俱并盍亦皆賦於
此乎觀二三子之志

華山黃神谷醺臨汝裴明府序

黃盧子滅景上漢千歲矣留碧峯白雲以貽後世故清機

勝事未始有極余吏於華之明年道侶裴冀亦再命爲臨
汝令夏六月假道澈邑稅鞅此山思欲追高步詣真境於
是相與攜手及二三友生童子將命者六七十人挈長瓢荷
大壺以濁醪素琴會於黃神之谷興也按谷之西頂實三
峯東面石壁叢倚束爲洞壑乳竇潛泄噴成盤渦兩崖合
闕若與天接二三子將極其登探也至則繫馬山足披榛
石門入自洞口至於梯路躡連嶂與疊嶠度嶮嶇而躡凌
兢夤緣絕磴及橫嶺而止澡身乎飛泉濯纓乎清漣想夫
君侯我於花峯下碧空而嬋娟愛而不見搔首空山然後

靡靈草以爲席傾流霞而相勸楚歌徐動沂詠亦發清商
激於琴韻白雲起於筆鋒是日也高興盡而世緒遣幽情
形而神機王頽然覺形骸六藏悉爲外物天地萬有無非
秋毫亦旣醉止則皆足言以志仙跡且旌吾友嘉會之在
山也

建丑月十五日虎邱山夜宴序

方今內有夔龍皋伊以佐百揆外有方叔召虎以守四海
江海之人高枕無事則琴壺以宴朋友嘯歌以展霞月吾
黨之職也吾是以有今茲虎邱之會巖巖虎邱莫吳西門

峩然如香樓金道自下方而踊鎖丹霞白雲於蓮宮之內
會之日和氣滿谷陽春逼人巖烟掃除肅若有待余與夫
不亂行於鷗鳥者銜流霞之杯而羣嬉乎其中笑向碧潭
與松石道舊兕觥旣發賓主醉止狂歌送酒坐者皆和吳
趨數奏雲去日沒梵天月白萬里如練松陰依依狀若留
客於斯時也撫雲山爲我輩視竹帛如草芥頽然樂極衆
慮皆遣於是奮髯屢舞而歎今夕何夕同者八人醉罷皆
賦以爲此山故事

冬夜裴員外薛侍御置酒宴集序

二公以大司馬之命領浙河東西十有三州之政相與周
爰咨度平均邦賦者三月矣當割而遊刃無間臨機而舍
拔則獲由是在薄領之際無江海而閒冬十月辛未徵會
於此堂宴朋友故舊也賢豪畢會升降有序逢衣淺帶十
有五人聲同故窮達不間意得而鄙吝皆遺肴芳酒濃夜
寂琴暢慷慨言志絡繹舉白盱衡抵掌啞啞大笑三爵耳
熱萬念如洗不復計名身之親疎憂患之去來也况他累
乎旣醉余以箸擊唾壺扣商而歌其詞曰薄領日盈機知
君傲煩囂飲和自忘渴况以初筵招道契跡自親誰爲列

宿遙何用結同心綠琴復長瓢日月若走馬炎涼催斗杓
一年解頤笑幾日如今宵奉君千金壽莫使歲寒凋是日
禮成於易歡生於同滯憤積慘悽掃湯沃方今溟海始波
世屯未康二公克壯其猷以立事爲已任行當自致青雲
之上不復與適莽蒼者羣矣吾儕浮湛其間與風水俱它
日或潛泉啖天一離一合雲動雨散然後知今日尊酒未
易再得將子無金玉其音姑借賦以卒賦

送宇文協律赴西江序

復周正之年天子以潤州刺史張公林

本集作休

爲豫章太守

豫章之人既庶且富部從事縣大夫缺而不補先以檄徵
協律於會稽時人皆賀豫章之得賢協律之遭遇君子則
曰夫子刃有餘地不啻切玉割小鮮而用其銚無乃不可
乎夫子曰不然蓋其不患秩卑而患已素餐不患國士之
不我遇患遇之而不答苟有用我者吾其爲執射乎於是
舉帆西陵是日于邁然後知大丈夫之感義而不私其身
也於越長路江皋暮春沈吟秦山悽愴鏡水豈不知今日
斗酒明旦不共顧懷安敗名無勇也怨別傷離非丈夫也
苟將申其道而成其務則萬里咫尺別何有二三子其

詠歌之以代雜佩

送賀若員外巡按畢歸朝序

今年春上以富人侯爲丞相百揆時敘九州賦錯方欲齊職貢之法崇底慎之典使六府修九敘成謂尚書吏部郎賀若公貞明直躬特達公器才足以茂功歲事政足以宏道救物故俾繡衣持斧巡撫江介分王命也公電發神機霜淬智刃其始至也問謠俗省疾苦命司書示年數之上下削郡縣之版圖且爲之實其多與寡以差等并賦焉然後勞之來之安之集之俾其有寧宇而族聚以宣天子之

宏恩而煦之於是乎民之樂矣如饑者之得以食也寒者之獲以纈也乃使苞茅之貢必敘而杆軸之詩亦不作冬十一月爰命郡吏致事言旋於京師且將捧府檄於南陔侍版輿以西上事有成而功不伐以是覲揚天子以盡考績之事禮也夫其由家以及於國資事親以事君甘旨之未遑勤於王家奔走之不暇以顯親身斯真能奉慈訓不廢陳力將君命不違色養忠孝之大者又人子人臣之所難及也而况奸宄已弭干戈將戢天子方以律令章程責成三府然則操六轡驟四駱周爰咨詢以成天下之務在

是行乎翰飛方騁瞻望何及唯獻酬東閣弼成大猷使烝
人粒海水靜農夫高枕及亦預焉凡執手於路者請偕賦
鴻雁取之子于征劬勞于野爰及矜人哀此鰥寡以爲善
頌

送長洲劉少府貶南巴使牒留洪州序

曩子之尉於是邦也傲其跡而峻其政能使綱不紊吏不
欺夫跡傲則令不苟政峻則物忤故績未書也而謗及之
臧倉之徒得騁其媒孽子於是竟謫爲南巴尉而吾子直
爲已任愠不見色於其胸臆未嘗蠶芥會同譴有叩閭者

天子命憲府雜鞫且廷辨其濫故有後命俾除館豫章俟
條奏也是月也艤船吳門將涉江而西夫行止者時得喪
者機飛不搏不高矢不激不遠何用知南巴之不爲大來
之機括乎由圖南而致九萬吾惟子之望但春水方生孤
舟鳥逝青山芳草奈遠別何同乎道者盍偕賦詩以貺吾
子

送王判官赴福州序

松梓梗枿茂於深山不能逃匠石之顧賢士君子晦其言
跡不能使人不已知其勢然也之子言忠信行篤敬以文

雅麗則括而羽之而世皆觀頤我獨儉德吾固知長風六
翮必有時而去及御史大夫李公之命介也辟書四下果
以嗣宗爲首歲二月載驟四駱脂車而東閩中者左溟海
右百越嶺外峭峻風俗剽悍歲比饑饉民方札瘥非威非
懷莫可綏也議者共謂君匡戎幕以義佐師律以禮報國
士以直道罷人以德使安危懸於指掌勝負決於談笑則
咨謀之道宏矣豈椎髻殊俗覆車畏途足爲志士之休惕
哉凡吾與之出祖者亦旣偕賦之

送薛處士業游廬山序

薛侯敦於詩固於學敏於行時然後言言而寡尤口弗言
祿祿亦不及識其真者以爲永歎而薛侯居之淡如君子
哉若人也方以城市鄙於邱壑倦游不如嘉遯是月也拂
纓上之塵西游廬山山上有峯頂大林下有東林西林化
成遺愛六寺惠遠道生二公昔嘗眷戀於斯焉履痕屐齒
遍滿崖谷神期盱嚮恒若對面之子之往獲心契矣苟藏
器於身時行則行大之將來隱顯一致彼安貞者其或爲
利涉之樞機乎趙補闕驊王侍御定張評事有畧各以文
爲貺記行邁之所以然余亦持片言用代疎麻瑤華之贈

送韋員外充副元帥判官之東都序

太尉臨淮王之秉旄淮沂也天子命公爲介洎臨淮薨而相國太原公繼授兵符盡護東夏諸將亦表公參成周軍事如初命故事登掖垣者不驅傳居諫臣者不就辟將使其能必易其秩故自左補闕爲尚書郎元年仲春始以使節赴洛陽經大盜虔劉之餘頑民雖遷汙俗未返三軍之心注於帥帥之耳目屬於參佐以公貞諒文敏能恤大事且成宣之後也故以部從事咨焉夫民殘則訛訛則流禁流莫若以德兵不戢則翫翫則暴禁暴莫若以信建信與

德以爲幕中之畫繫吾子是冀將賀不暇別於何有我飲
餞者姑以詩代路車乘馬

送孫侍御赴鳳翔幕府序

右扶風之地枕跨隴蜀扼秦西門帝命司徒爲唐方叔開
府之日搜賢自貳於是孫侯以監察御史領司徒掾夫子
卿族也用文學纘緒而兄弟皆材伯曰宿以秋官郎辟丞
相府仲曰絳拾遺君前及余爲寮夫子則以貞幹肅恪之
能入主方書出佐戎政花萼灼於三臺時人榮之二月丙
午乘傳詣部人謂扶風於是乎有三幸獲白額而南山有

採藜藿者一幸也

先是司徒於南山擒賊帥高玉

今夫操兵者如虎而司

徒仁而愛人二幸也其府君則賢其幕府多士而孫侯懿之以文德三幸也恪於德以臨事度於義以從政力於忠以成績吾子勉之其蔑不濟矣士爲知己者用豈干榮乎請居者歌之子其行乎君子贈人以言亦以是也

清明日司封元員外宅登臺設宴集序

可以排天下細故使憂客不作莫聖於酒況與同志者共之復遇司烜出火勾芒宣氣天地氤氲熙我以春乎是日也卉木羅其庭除柔嘉充於圓方言必遺累笑必造適故

談話不及朝市跡無町畦事不機括故和樂不恃笙磬主
人有才子四人侍酌於前臺下有南山倚庭碧草芊芊溝
塍圃畦如龍鱗龜甲芳樹繡布白花雪下於是一觴解頰
再觴解憂三觴忘形而傲隨之商絃數奏牆陰移而坐客
醉手持濁醪笑向朗月夫以世道之多故年歲之不吾與
也若憂患歡樂眾寡之不侔苟來者猶可追無亦顧隙間
之駟以罇酒買笑余敢惜費貽青春羞凡今日之娛莫我
若也吾乃今日視薄游空名如爭蝸角又何用知接輿伯
夷不遇於杜康乎顧謂滿座展詩以贈亦命夫四子者志

之

送澤州李使君兼侍御史充澤潞陳鄭節度副使

赴本道序

今歲皇帝擇可以守四方之臣分命大司徒涼公作蕃汧
陽平秩西夏涼公季弟曰抱真敬事好學仁勇忠信凡仁
則不偷勇則不撓忠則能宣力信則人任焉故天子器之
方倚以胥附使宅高平綏厥有眾董次將之任且以柱後
惠文冠冠之詔下之日軍府胥悅蓋蕭何守關中舉宗詣
軍而涼公荷方召之寄亦以愛弟居東旅於行間忠之大

者夫高平上黨之地當趙魏燕代潞之咽喉太行恒山爲之襟帶公居有專城之任行有亞旅之職其畧足以固其封疆其惠足以柔其民人勗哉夫子進吾往也伯兮仲兮執兵之要謹身以肥家自家以刑國高平之政可以未行而窺矣彼瞻望佇立壯夫恥之非歌詩莫足以贈

送兵部梁郎中上奏事旣畢還幕府序

元年夏相國涼公將城汧陽百里二城即戎於境先命從事兵部郎中安平梁公鎮如京師請王命且料民以調兵食五月甲戌至自雍危冠上前手畫地圖以兵機軍儲屈

指而條奏上甚悅事下三府六月庚戌以璽書還雍改轅而西旣犯輟於是有追而送之者皆賦以美夫使臣將命而往者不辱命而又專對以直君遣使臣以禮詩之所由作也且公亦嘗郎中宰昭應矣而昭應之奏績也賦惟均而人惟和及參事於相府相府穆穆今元帥七萃之士萬計以王命伐不庭公章甫其冠縵胡其纓咨諏乎轅門惟慎惟嚴靡不盡乃心布乃謀敷乃心腹腎腸討軍實而申倣之咸莫不指臂其宜也手足之捍頭目也戎政所舉蔑不以濟票衛之制勝在我營平之威謀越人子姑佐之固

亦整軍經武而爲干城之賴者唯王室是獎夫豈徒以一
介之末區區乎載驟四駱皇華原隰之謂也歟秋晚筋勁
隴關雪下企子望吾子以班固之筆札銘崆峒山而還悠
悠我思章句以贈之

送成都成少尹赴蜀序

歲次乙巳定襄郡王英乂出鎮庸蜀謀亞尹僉曰左司郎
成公可溫良而文貞固能幹力足以參大畧弼成務旣條
奏詔曰俞往公朝受命而夕撰日卜十一月癸巳出車吉
尚書諸曹郎四十有二人歎軒騎將遠故相與載籩豆醢

牟判羊膾鮐修飲餞於肅明觀以爲好飲中客有賦蜀道
難者公曰士咸遇則忘軀臣受命則忘家姑務忠信夷險
一致患已不稱於位於行邁乎何有言訖抗手建節即路
且以紛悅刀礪侍輕軒而西凡強學以修業積行以取位
赴知己不爲名適四方不違親卿大夫之孝也吾子其毋
忘可移之忠將咨度是務使岷峨其又苛慝不作天聽自
民誰謂蜀遠夫別細故也豈薑芥乎凡今會同非詩無以
道居者之志

送吏部杜郎中兵部楊郎中入蜀序

二公罷東西曹草奏啟事之劇而參軍西南時人或譏朝廷易其大而難其細及以爲不然當其天子命將帥以守四方丞相秉鉞爲唐南仲擇佐命介宜先才者賢者事孰大焉彼夫采薇出車以遣役勞勤我則異於是受王命者不言勤赴知己者不愴離今日斗酒姑展交好遂以道吾子四方之志亦使滿座歌二公乎

送商州鄭司馬之任序

往歲司馬宰湖而湖人安輯是德政之孚也大駕東狩之往復也其供帳職辦無不整具因是天子以爲能故寵之

以兩綬勞勤也今茲佐商增秩也人謂使人任器之道當處司馬以劇而觀其利用司馬曰與其徇名以利人寧勤身以安親況佐郡之逸乎於是五采其衣是日南邁流火戒節寒蟬嘹唳嶢闕白雲片片秋色二三子之感時傷離者斯可以言詩矣

送洪州李別駕還任序

別駕昔嘗宰三縣佐四郡未始不以廉直爲己任亦未始以廉直銜己名仕有餘力則寄傲於琴趣遠是以曲高意精是以聲全得於心而形於手故非外獎所及當其操絃

如操政焉時人知其琴不知其政善而無伐光而不耀故也今也來思上台解榻卿大夫士從之如不及時因觀操縵之妙可以見從政之道是行也吾子其懋修乃德恪儆爾位夫亦將抑與不暇求於何有維湯湯郢音明旦將遠廬峯湓水大江間之風景可同而聽不可共由是眾君子賦詩以壯別且曰備折楊皇華之韻用抒他年之相思

送韋司直還福州序

遠別非難行路難行路非難相逢難始者與吾子會於撫以吾一日長乎子子嘗敦弟兄之好而不吾先自雲搖雨

散凡四悲秋而一會面亦旣道舊別又繼之斯亦可以愴
矣然君子患德之不逮不患人不我知吾子克愼厥身以
荷先大夫之覆露賁然將命爲邦司直被服文行而鏃礪
之揚其家聲吾惟子之望豈行邁與聚散足貽志士之忻
戚乎是別也祇以歌咏貺吾子而已

送潁州李使君赴任序

公之爲潁州也朝廷以不失人爲明潁人以得父母爲幸
公獨以去色養爲戚故執事者難之其爲公謀者則曰受
命忘家公也愛親讓祿私也君子不以私廢公不以孝棄

忠況國家方親親賢賢而當賴人俟師長之日可以此時
急聞禮而緩君命乎公曰諾然後明日朱兩轡而東竭力
致身之誠於是乎全矣方當輯寧疲人襦而袴之宜其大
王事而小行役豈徂暑之熱遠道之思與前期之難足攪
胃臆賦詩勗別於以持贈

送屯田李員外充宣慰判官赴河北序

秦吳燕宋之別昔人所愴若君子以令德佐王之使臣將
命以適四方當用文教柔遠威懷示德則其舉也可以悅
其愴也可以遣况吾子家本全趙倦游一紀駟馬以過故

鄉足展南枝北風之思買臣歸越相如還邛古今相望是
可同轍明日渡滹沱涉桑乾布王澤覽風俗之暇爲我問
藂臺蒯邱厥狀何似平原樂毅故事存否歸而揚摧用廣
異聞夫道別離之志亦緣情之不能已耳

送歸中丞使新羅弔祭冊立序

儒家者流鮮肯冠獬豸冠者蓋抗節剛奮以排擊爲氣使
故也今天子以公身衣儒服力儒行行之修可移於官學
之精可專對四方是故公任執法之位且使操節以濟大
海頒我王度於大荒之外夫新羅嗣王以喪訃且請命於

我矣我則歸賄繼好以策命命之實懷遠示德禮之大者
夫亦將宏宣王風誕敷微言使雞林塞外一變可至齊魯
不然歸公何以不陋九夷之行也蓋行於忠信者無險易
拘於王程者無遠近故公受詔之日則遺其身視涉海如
蹈陸謂窮髮猶跬步豈鯨怒鼉抃足戒行李凡以詩貺別
姑美遣使臣之盛云爾

送渭南劉少府執經赴東都覲省序

彼徇名者遭時多故乘地高勢便罕不爭先鞭務飛速以
誇當代獨吾子以文行裕蠱思不出其位奉簞金之所遺

金匱要略卷之三
羞地芥而不拾其初以筮仕也典校祕書祕書之職修尉
於渭南渭南無糶政歲二月以紛帨觸燧歸覲於洛白華
之戀也和氣用事春物滿眼之子于征五綵其服想成皋
花合穀洛水大是吾子拜嘉慶問清高之日歟夫克家而
家肥策名而名彰居官而居辦孝之大者也則貂蟬羔雁
將在子外府姑務遠圖何嗟少別到洛陽爲我寄聲謝鳴
皋故山杼離如之何詩以贈遠

送餘杭薛郡守入朝序

有大道者遺小成之跡抱宏畧者非曲士所見公嘗以匪

躬之故三入承明時議用舟楫期公者七載矣而猶建隼
河濡洗幘江島興貝錦之歎詠跋胡之詩豈不以名至盛
德至廣而厦材多節夷道若顙乎今天子受宣室之釐忽
思賈誼以謗書之篋先示樂羊且搜元珠俾詣丹闕則巨
鱗方縱未可料也雖欲抱黃老之術與赤松子游公器所
歸難乎免於珪組矣夏五月弭棹睢渙脂車而西火雲成
峯郊草如織誰謂秦遠岐予望之有以見升赤霄捧白日
在此行也謂攀四牡者各賦南山有臺之四章取樂只君
子德音是茂以爲志云爾

崔中丞城南池送徐侍郎還京序

侍郎昔爲河南督郵河陽令其解龜也東人思其遺美今
出入夷險歷二十載而一來廳樹未老佐吏半在公位望
章綬輝光城邑觀者榮之而東都主人亦以籩豆醖宰徵
會修好之不暇凡萃止十有五日而去去之日主人歎瞻
佇之莫及也故又醺酒於此池池上有雙彩艫與竹齋對
布賓主位於樽之左右而蘭臺金閨建禮承明之英十有
八人序列其次池外有闕塞雙嶺遙作外戶嵩高逶迤數
峯當窗伊洛春樹若刺繡布錦仙桃火然顧我則笑於是

游眺之不足則舉白以相勸而狂歌送之唱棹鳴榔簫鼓
陳乎其間醉中疑三江五湖去人不遠謂千慮萬事無非
妄作况少別可以興愴乎但駟馬行塵明日將遠登而無
賦謂樽酒何宜歌而詩之且以見追攀者之志

送蔣員外奏事畢還揚州序

揚州牧趙國崔公使其部從事侍御史吳興蔣晁如京師
條奏官府之廢置歲月之要會其來也吳楚之衆君子酒
而詩之而薛水部并李司直翰雙爲之序以冠篇首旣將
命趙公拜左僕射蔣侯加尚書郎之位其還也之子日執

書卷以言於朝曰始者與數賢別賴斯文故常若在眼今幸而遷秩行車在門明日離羣想今日之會亦猶於此而思彼也非置書袖中人謂我何然後西人之舊者皆賦韻道別而鄙夫和之詩大畧蓋美蔣侯以才智任職有周爰咨諏之用而將事不墜專對不辱能一其心以佐大府之政政靡小大惟公是謀謀之臧歸於府不知我者則謂我專趙公所以有成璿坐嘯之論而無慚示樂羊謗書之篋而不疑斯可謂之明矣今也於歸腰曳兩綬然濁涇素滻春水始生秦原青青諸草皆秀可共樂也而又別焉凡我

同寮是以有瞻望不及之歎故送遠之志悉形於文

晚秋陪盧侍御遊石橋序

以公責左遷於茲迨一周星矣首疾心痠繼日經懷實由
南冠尚簪憂所未忘是以幽求人境之外將蕩滌煩慮得
諸石橋久之豈無他人不如我志願言卒獲者亦久之殿
中御史范陽盧子至監理下國未浹辰而居簡乘暇行鑣
載勒致爲客數公方駕賓從如林煌煌焉奔走乎虛落延
屬乎禪宮矣三登彌高累息以進而後偕集於橋下徒觀
夫挂長虹以飛來凌半霄而勢去下空如豁纖蘿不生上

頂平衍惟佳木藂秀不可得而總載也以爲本於融結庸
可自然資於造化力役不及明矣東極大水北走長安羅
郭雉堞如示諸掌大田多稼宜乎有秋羣山積翠以回合
好鳥追飛而下上有是勝賞以是開懷盍賦新詩以紀一
時之事也侍御以嘗忝鵷沼潤色鴻業以文司錄俾序良
游敢復畢辭多慙老敗

欽定全唐文卷三百八十八目錄

獨孤及五

唐故左補闕安定皇甫公集序

唐故殿中侍御史贈考功郎中蕭府君文章集錄

序

揚州崔行軍水亭泛舟望月宴集賦詩序

送武康顏明府之鄂州序

送六合林明府清白名聞上都赴選序

送崔詹事中丞赴上都序

送李副使充賀正使赴上都序

送張徵君寅遊江南序

送李白之曹南序

送張處士申還舊居序

宋州送姚曠之江東劉冉之河北序

送張泳赴舉入關序

送史處士歸滏陽別業序

送開封李少府勉自江南還赴京序

送陳畱張少府勛東京赴選序

送弟恂之京序

送韋評事赴河南召募畢還京序

檢校尚書吏部員外郎趙郡李公中集序

送孟評事赴上都序

送柳員外赴上都序

送崔員外還鄂州序

送朱侍御赴上都序

送少微上人之天台國清寺序

送陳贊府兼應辟赴京序

送司華自陳畱移華陰赴任序

欽定全唐文卷三百八十八

獨孤及

五

唐故左補闕安定皇甫公集序

五言詩之源生於國風廣於離騷著於李蘇盛於曹劉其所自遠矣當漢魏之間雖以樸散爲器作者猶質有餘而文不足以今揆昔則有朱絃疏越太羹遺味之歎歷千餘歲至沈詹事宋考功始裁成六律彰施五色使言之而中倫歌之而成聲緣情綺靡之功至是乃備雖去雅寢遠其麗有過於古者亦猶路鼓出於土鼓箏籥生於鳥跡也沈

宋旣歿而崔司勳顥王右丞維復崛起於開元天寶之間
得其門而入者當代不過數人補闕其人也補闕諱冉字
茂政元晏先生之後銀青光祿大夫澤州刺史諱敬德之
曾孫朝散大夫饒州樂平縣令諱价之孫中散大夫潭州
刺史諱顥之子十歲能屬文十五歲而老成右丞相曲江
張公深所歎異謂清穎秀拔有江徐之風伯父祕書少監
彬尤器之自是令聞休暢舉進士第一歷無錫縣尉左金
吾兵曹今相國太原公之推轂河南也辟爲書記大厯二
年遷左拾遺轉右補闕奉使江表因省家至丹陽朝廷虛

三署郎位以待君之復不幸短命年方五十四而歿嗚呼
惜哉君忠恕廉恪居官可紀孝友恭讓自內形外言必依
仁交不苟合得喪喜愠罕見於容故覩君述作知君所尚
以景命不永斯文未臻其極也蓋存於遺札者凡三百有
五十篇其詩大畧以古之比興就今之聲律涵詠風騷憲
章顏謝至若麗曲感動逸思奔發則天機獨得有非師資
所獎每舞雩詠歸或金谷文會曲水修禊南浦愴別新聲
秀句輒加於常時一等才鍾於情故也君母弟殿中侍御
史曾字孝常與君同稟學詩之訓君有誨誘之助焉旣而

麗藻競爽盛名相亞同乎聲者方之景陽孟陽孝常旣除
喪懼遺製之墜於地也以及與茂政前後爲諫官故銜痛
編次以論撰見託遂著其始終以冠於篇

唐故殿中侍御史贈考功郎中蕭府君文章集錄

序

足志者言足言者文情動於中而形於聲文之微也粲於
歌頌暢於事業文之著也君子修其詞立其誠生以比興
宏道歿以述作垂裕此之謂不朽侍御諱立南蘭陵人也
御史中丞汝州刺史府君之仲子奕世純嘏及公始大襁

祿克岐十五而立神靜氣和才與道并孝悌忠信以爲已
任行有餘力故幼而學文嘗謂揚馬言大而迂屈宋詞侈
而怨沿其流者或文質交喪雅鄭相奪盡爲之中道乎故
夫子之文章深其致婉其旨直而不野麗而不艷天寶元
年詔徵賢良方正以備多士公時年十七射策甲科盛名
翕然震誼京邑論者知遠大之跡自此始也旣而荏苒宦
途遭遇世故厯佐戎幕周旋江海攸徂之邦必聞其政嘉
謨成績藏在諸侯之策旣言中彝倫亦動與吉會由是自
廷尉評拜監察御史轉殿中侍御史觀其逐逐利往冥冥

翰飛方將乘驚風以騁驚視青雲如咫尺天道何善而無
報與其才而不與其壽成其器而不成其志命矣夫斯才
也而有斯年也公之元兄尚書庫部員外郎兼侍御史曰
某與公俱以文學政事爲臺閣領袖丹穴之雙鳳纔舉棠
棣之一花先落天倫之慟可勝旣邪以公瑰姿瑋度利器
淑德與東流皆逝今則已矣可以藏遺芳以示後嗣者其
惟夙昔麗藻平生翰墨乎於是茹痛開緘收血散帙緝其
遺札得詩賦贊論表啟序頌銘誄誌記凡若干篇編爲五
卷以爲集錄庶幾弔賈生者省鵬集之日問相如者知禪

草猶存云爾

揚州崔行軍水亭泛舟望月宴集賦詩序

言同者無約束而信心同者未謔浪而樂聲應情至則不
俟外獎況遺累之言造適之笑與杯中物池上月風中絃
五者合以貺余歡其可勝旣乎於時衆君子棲公翰林如
翔鳥之得茂樹也至是登於仙舟泳彼新流掇芳玩奇以
永今日日不足故用夜漏以繼之羽觴未及數覆銀河橫
而金波上樂作神王百憂如失而絃繁管清悲歡交乎其
間則高歌爭進或道舊以泣酒酣意真樂極感至故也當

斯時視身後之竹書鼎銘猶稊米芻狗也況細故乎二三子醉猶能賦且酌且咏余屬而和之

送武康顏明府之鄂州序

多故以來干祿者進必欲速大抵悉棄夷道而趨捷徑顏子獨曳儒服非其知己之命不苟合非稽古力所致不妄動今其來斯也不以賄不以名不以遊眺挾策讀書藝成而去君子哉若人邪將以特舟片帆泝洄於大江秋濤之中涉彭蠡歷西塞浮於潛踰於沔吾子安於忠信亦當安於風波況滔滔江漢茫茫禹跡乎於此乘渚反顧齊吳榜

以擊汰其聲可想司馬子長浮沅湘窺九疑亦此路也足以覽古乘興窮極視聽行將搜異不暇懼於何有凡今賦詩以抒居者之思且以用勗吾子四方之志云爾

送六合林明府清白名聞上都赴選序

今之爲邑者祇事趣辦而已矣之子獨以公廉不苟聞於朝廷夫公則能力廉則不苟不苟則無害六合之人飽是三德故家肥人讓而名隨之其黜陟考績之日首冠賢能之選也宜哉夫上方勤恤人隱渴良吏如不及之子令聞將與位偕行將見函洛春物迎馬首於千里之外勿謂蕪

城衰草足愴遠別二三子何以持贈其歌詩乎

送崔詹事中丞赴上都序

初公由尚書郎出佐蜀郡無何熊軾暢轂專席而坐休績
布於巴漢天子器之時人謂公逸足駸駸視公卿猶步武
耳旣而剖符驅傳出入吳楚專五城佐三府府罷身退復
藏於密出處之道厯二十載而未光知公者不堪其歎公
未始屑於胸臆貞直廉讓之德內充故也夫貞則專直則
固廉則不競讓則後時故其寵不及而名益茂也宜哉今
上方勵精熙載用官人安民爲急百工以釐不至者知罪

故公朝賁然伏軾入闕時然後行動而不格在是役也銷
憂者莫若酒酒中樂酣可以道千里之意者莫若文羣賢
詩之以送遠蓋古人雜佩以贈之之流也

送李副使充賀正使赴上都序

之子領祕書著作於是邦參我軍事事必肅謀必忠居處
必恭三年矣而身無擇行職無牾政政之和非吾子曷賴
今茲將東諸侯之命朝於京師稱壽之儀舉專對之才達
是行也將爲度材者所得豈復顧池中乎正月元日和氣
資始大行設九賓於蓬萊前殿皇帝輦出百辟奉賀公將

以此時捧章奏於雲陛之下得觀虞舜之九成箫韶塗山之萬國玉帛況惟仲氏典司宸翰棠棣之華交映於朝斯可謂之榮矣懋修乃職尚慎行邁勉從欒伯之戒將復臧孫之烈至如遵大路之歎不足爲吾子設矣吾當同寮且士龍之執也江樓醉別何用貺遠以其章句當佩玉瓊琚乎

送張徵君寅遊江南序

初貞元二年進賢星明於是夫子與廣陵馬曾俱以元纁辟焉一命而俯受服赤墀之下子甘節不奪歸耕南陽議

者稱馬之利用陋子之獨善及以爲不然君子之道舒之則雲蒸雨降以救大旱卷之則天倪道機不盈一握姑務忠信以安聖時則歌國風於畎畝是亦爲政有民人焉有社稷焉何必薄遊然後稱德至是夏六月以菰菜之興扁舟而東是行也與夫乘桴揚舲者不同日矣津樓直望江漢在目少別非志士所悲深衷豈短章能見桃源秋至僕當塞其仙實俟子於武陵之南溪

送李白之曹南序

曩子之入秦也上方覽子虛之賦喜相如同時由是朝詣

公車夕揮宸翰一旦襍被金馬蓬累而行出入燕宋與白
雲爲伍然則適來時行也適去時止也彼碌碌者徒見三
河之遊倦百鎰之金盡乃議子於得失虧成之間曾不知
才全者無虧成志全者無得失進與退於道德乎何有是
日也出車桐門將駕於曹仙藥滿囊道書盈篋異乎莊舄
之辭越仲尼之去魯矣送子何所平臺之隅短歌薄酒擊
筑相和大丈夫各乘風波未始有極哀樂且不足累上士
之心況小別乎請偕賦詩以見交態

送張處士申還舊居序

海水不揚波久矣故昆蟲草木得遂本性夔益巢許各安其節天鍾靜於子而博之以文大壑無底虛舟任觸世皆尚白獨守太元顧流俗而不言退將修乎初服吾於是見全人之操矣乃知白雲上下蓋無心自出黃鶴飛去當有時而來他年孤舟冀再會於五湖之口

宋州送姚曠之江東劉冉之河北序

春葉尉吳興姚曠至自洛陽中山劉冉至自長安俱以文博我相與交歡於睢渙之涘始則開青天豁其雲霧亦既窺武庫見其矛戟凡旬有五日而姚適吳劉濟河余歸梁

各有四方之事將爲千里之別夏四月抗手於盧門議別
故也夫別與會悲樂存乎其中故賢智所不能遣然達者
遊世隨變所適靜而與陰同德動而與陽同波異乎金柅
之有繫匏瓜之莫食子其行矣別何爲者北斗在巳南風
始來藂臺草長京口水濶何以送遠唯當賦伐木以爲仁
人之贈

送張泳赴舉入闕序

彼馳騖乎士林者鮮不爭九流之勝負徇三川之聲利而
張侯獨以善閉關乃知純白內充天機外朗則塵垢糠粃

所不能入癸巳歲六月始以出處之道問仕於余予灑然
曰今四表文明八紘屢頓此志士所當登秀造而取青紫
不奮不躍如休明何由是罷琴高臺投竿舊浦單車匹馬
是日西上君子以爲知幾吾見垂天之雲不復顧北溟矣
盍使居者歌吾子乎

送史處士歸潞陽別業序

初史侯至自帝邱僕方醺酒於蔣氏之館揖讓堂下由東
階升於是一酌而賓禮舉再酌而交態接三酌而威儀幡
幡深衷畢見醉裏投分客中忘形吾固知握手難常嘉會

可惜其聚也言不浹日而意氣感其散也興未及盡而離憂至則臨觴徙倚孰能不以之黯然窮陰欲臘漳滏冰厚班馬連嘶歸雲無色非詩何以見離羣者之志

送開封李少府勉自江南還赴京序

世或謂邦有道穀或謂全於德者不以徇名降志彼於致命猶數數然孰與李侯兩忘而脗合之張其天機與道出處道長則陳力筮仕績成而退藏於密戰勝江海之上然後乘歸流而返舊京乃知淩雲麗天則切玉利器於夫子爲鄧林之一葉耳而精微純粹豈中士所能得其門哉然

當今堯親九族契敷五教材之美者工將度之子雖忘機
機未忘子庸詎知泥蟠沙卧不爲雲霄之鑿枘乎但蘭舟
桂楫倏忽鳥逝朔風秋草奈離憂何緣情者莫近於詩二
三子盍咏歌以爲贈

送陳畱張少府勛東京赴選序

每歲孟春冢宰懸象魏之法以官民材天下髦士於是乎
雲屯詞鋒角立智刃今子投袂而起將鼓行乎其間其於
湛盧發硎批郤如玉繁弱在手捨拔則獲者吾惟子之望
當知君子廣其業達其道則榮譽貴仕可得而拾孰云嫻

嫋秋風悠悠遠道足爲志士之感哉雜佩可以申永懷尊
酒可以慰別緒其贈言之分顧謂坐者志之

送弟恂之京序

蒼龍居元枵之歲與爾吹壘簫於長安靈臺之下當時爾
方青襟余適紉袴各志小學相期大來其後爾以經術薦
遂觀光於上國余牢落兩河爲病所繫星分雨散十有二
載中間暫攜手一笑者及今而三昨日遊寓今成疇昔此
會綿邈空成夢想豈不欲申橘柚之性咏和樂之什樂未
終也別又繼之然君子修誠則物應克已則名彰爾能珪

璋特達甲冑忠信致逸足於千里吾有望焉方務遠圖何
嗟少別到秦地有問吾事者爲報江湖閒心

送韋評事赴河南召募畢還京序

自唐蒙司馬相如開牂牁鑿零山於是西南夷君長始受
漢印及國家綏以大道振以長策滇越邛僰世亦皆爲外
臣蠢茲六蠻獨抗王旅天子方將開外戶掃絕漠故授相
國衛公鉞俾出作方叔入爲吉甫且募如貔之介士將翦
長蛇之速飛由是分命我廷尉評事韋公實佐其任公以
止戈論之采薇歌之使政有典則人知義所故燕齊少年

韓魏勁卒召募如景附赴敵如焱馳自春至於是月受命羽檄之下凡萬八千計然後頒賜算級將朝於京師夫勤王集事之謂忠周爰咨詢之謂智復命而不憊於素之謂信姑樹三德載馳六轡行當以柱下之書讚幕中之畫是役也冥冥羽翰非瞻望所及矣請偕賦以知魏風

檢校尚書吏部員外郎趙郡李公中集序

志非言不形言非文不彰是三者相爲用亦猶涉川者假舟楫而後濟自典謨缺雅頌寢世道陵夷文亦下衰故作者往往先文字後比興其風流蕩而不返乃至有飾其詞

而遺其意者則潤色愈工其實愈喪及其大壞也儷偶章
句使枝對葉比以八病四聲爲拮拳拳守之如奉法令
聞皋繇史克之作則呶然笑之天下雷同風驅雲趨文不
足言言不足志亦猶木蘭爲舟翠羽爲楫翫之於陸而無
涉川之用痛乎流俗之惑人也舊矣帝唐以文德專祐於
下民被王風俗稍丕變至則天太后時陳子昂以雅易鄭
學者浸而嚮方天寶中公與蘭陵蕭茂挺長樂賈幼幾勃
焉復起振中古之風以宏文德公之作本乎王道大抵以
五經爲泉源抒情性以託諷然後有歌咏美教化獻箴諫

然後有賦頌懸權衡以辯天下公是非然後有論議至若
記序編錄銘鼎刻石之作必採其行事以正褒貶非夫子
之旨不書故風雅之指歸刑政之本根忠孝之大倫皆見
於詞於時文士馳騫颺扇波委二十年間學者稍厭折楊
皇荂而窺咸池之音者什五六識者謂之文章中興公實
啟之公名華字遐叔趙郡人安邑令府君第三子質直而
和純固而明曠達而有節中行而能斷孝敬忠廉根於天
機執親之喪哀達神明其任職釐績外若坦蕩內持正性
諫不犯顏見義乃勇舉善惟懼不及務去惡如復仇與朋

友交然諾著於天下其偉詞麗藻則和氣之餘也學博而
識有餘才多而體愈迅每述作筆鋒風生聽者耳駭開元
二十三年舉進士天寶二年舉博學宏詞皆爲科首由南
和尉擢祕書省校書郎八年歷伊闕尉當斯時唐興百三
十餘年天下一家朝廷尚丈夫羿工乎中微拙於使人無
已譽公才與時并故不近名而名彰時輩歸望如鱗羽之
於虬龍也十一年拜監察御史會權臣竊柄貪猾當路公
入司方書出按二千石持斧所向郡邑爲肅爲奸黨所嫉
不容於御史府除右補闕祿山之難方命圯族者蔽天聰

明勇者不得奮明者不得謀公危行正詞獻納以誠累陳
誅兇渠完封疆之策閭犬迎吠故書畱不下時繼太夫人
在鄴初潼關敗書聞或勸公走蜀詣行在所公曰柰方寸
何不若間行問安否然後輦母安輿而逃謀未果爲盜所
獲二京旣復坐謫杭州司功參軍太夫人棄敬養公自傷
悼以事君故踐危亂而不能安親旣受汙非其疾而貽親
之憂及隨牒願終養而遭天不弔由是銜罔極之痛者三
故雖除喪抱終身之戚焉謂志已虧息陳力之願焉因屏
居江南省躬遺名誓心自絕無何詔復授左補闕又加尚

書司封員外郎璽書連徵公卿已下傾首延佇至之日將以司言處公公曰焉有隳節奪志者可以荷君之寵乎遂移疾請告故相國梁公峴之領選江南也表爲從事加檢校吏部郎中明年遇風痺徙家於楚州疾痼貧甚課子弟力農圃贍衣食雅好修無生法以冥寂思慮視爵祿形骸與遺土同惟吳楚之士君子譔家傳修墓版及都邑頌賢守宰功德者靡不齎貨幣越江湖求文於公得請者以爲子孫榮公遇暇日時復綴錄以應其求過是而往不復著書少時所著者多散落人間自志學至校書郎已前八卷

并常山公主誌文竇將軍神道碑崔河南生祠碑禮部李侍郎碑安定三孝論哀舊遊詩韓幼深避亂詩序祭王員外端沈起居興宗裴員外騰文別元旦詩并楊騎曹集序王常山碑並因亂失之名存而篇亡自監察御史已後所作頌賦詩歌碑表敘論誌記讚祭凡一百四十三篇公長子羔字宗緒編爲二十卷號中集其中陳王業則無疆頌主文而譎諫則言鑒舍元殿賦敦禮教則哀節婦賦靈武二孝讚表賢達盛德則崔賓客集序元魯山碣房太尉德政碑平原張公頌梁國李公傳德先生誅權著作墓誌李

太夫人傳盧夫人頌一死一生之間抒其交情則祭蕭功曹劉評事張評事文吟咏情性達於事變則咏古詩思舊則三賢論辨卿大夫之族姓則盧監察神道碑自敘則別相里造范倫序詮佛教心要而合其異同則南泉真禪師左溪朗禪師碑其餘雖波瀾萬變而未始不根於典謨故覽公之文知公之質不俟覲容貌聽詞氣假令束帶立於史臣之位足以潤色王度天而病之時不幸歟公之病也嘗以斯文見託詒某書曰桓譚論揚雄當有身後名華亦謂足下一桓譚也及於公才宜播其述作之美明於後人

故拜命之辱而不讓今乃著其文德爲之冠於篇首焉

自監

察御史已下文苑英華作自監察御史已後迄至於今所著述者公長男羔字宗緒編而集之斷自監察御史已前十卷號爲前集其後二十卷頌賦詩碑表敘論誌記讚祭文凡一百四十四篇爲中集其中陳王業則無疆頌議世道則卜原論質文論主文而譎諫則言暨舍元殿賦敦禮教則哀節婦賦靈武二孝讚與外孫女二孩書表賢達盛德則元魯山碣房太尉頌德銘崔賓客集序平原張公頌梁國李公傳德先生誄權著作基表李夫人傳盧夫人頌一死一生之間抒其交情則祭蕭功曹劉評事張博士文吟咏情性達於事變則咏古詩辨卿大夫族姓則盧監察神道碑思舊則三賢論自敘則別相里造范倫序詮佛教心要而會其異同則南泉真禪師左溪朗禪師碑其餘雖比興萬變而未始不根於道德故覽公之文知公之質不俟覲容貌聽詞氣而後覩其行若使東帶立於史臣之位其備獻替足以潤色王度正一代之訓與天而病之國不幸也然遐叔身甚病而心甚壯文益瞻而才不竭則前路

逸氣詎可度矣他日繼於此而作者當爲後集及
常遊公之藩也久故錄其述作之所以然著於篇

送孟評事赴上都序

孟子以鄉舉秀才射策甲科二十年矣同時中楊葉者今
或蔚爲六官亞卿或彤襜虎符秩二千石而孟子猶羸馬
青袍客江潭間遇與不遇何其寥夔也然君子不患貧患
業不修不患位下患道不行孟子言忠信行篤敬好學工
文令名藹然今茲入關有司之喜也諸公展相遇之禮其
肯不以推之挽之爲已任見三月四月之交灋灋之間王
睢飛鳴草木暢茂是吾子彈冠之時也二三子不可以不

賦

送柳員外赴上都序

初弱用之拜也吏者隱者相見皆賀曰朝廷搜賢不遺邱壑中人則搢紳之賢者日至矣未有賢人至而太平不興者而弱用獨以衰疾行邁爲憂諫議大夫昌黎韓幼深貽弱用書曰君子之命知己之遇其可易乎由是不敢言病卽日戒路夫君子之道進不苟容退不懷安不以欲拂人不以私棄公時止則止時行則行弱用之心也仁矣哉與夫捨龜觀頤自盛以橐者異矣方今主上用文思柔遠魏

邠謀謨惟賢是渴想見厖眉大冠俯僂於朝廷與公卿大夫言三代故事出入金馬石渠之署國人孰不宜之今之史臣樂安蔣鎮博陵崔儒頃與弱用同以德進倘與夫二君子道舊必話鄙夫疲於郡齋之狀勿使不知我者謂我不思若夫抒今日秦吳之別斗酒之外詩而已矣

送崔員外還鄂州序

員外曳朱組擁使節將鄂州牧御史中丞吳公之命方舟如吳祗役葢事肆覲伯姊展歡申悲浹辰而還飲水恪慎夙夜匪懈孝悌友恭形於容止追攀者觀禮於公見公之

仁繫公之先德與位偕由大王父已下一門三太子保傅
二御史大夫一宰相四二千石家之範可刑於國今則兄
掌冬官弟列郎署閨門怡怡花萼相鮮欲辭必復之榮朝
廷其肯捨諸永言夙昔將繼舊好惠而顧我其敢不以久
要爲答雖嘉肴充圓方旨酒盈樽疊祗攪別緒不足慰瞻
望不及之歎故可以於此乎言詩

送朱侍御赴上都序

子以才茂經明鄉黨稱仁起褐衣四五年超參夏口軍事
同時諸生有未登賢能之書者公以惠文冠出入殿中蘭

臺其以文章干祿何啻如拾芥吳中賢士大夫由是益勸
今復戒鞅而西言赴所從昔陸士衡入洛張華如舊相識
之子之文章粲然有昔賢風采彼茂先之徒其肯捨吾子
乎將子獻詩著論特備風雅以宣上德抒下情爲已任勿
獨誇吳趨閭門之廢興辯蓴羹羊酪之優劣而已急賢之
日何患人不已知凡今贈別皆吳士也

送少微上人之天台國清寺序

或問上人曰文者所以足言也言說將忘文字性離示入
此徒無乃累一相乎答曰稱示入者過矣以習氣未之泯

也率性修道庶幾因言遣言故欲罷之而未能耳時人謂上人爲知言知道歲次乙卯自京持鉢而來給事中天水趙公湄賦詩抒別卿大夫已下屬而和者二十七章旣而飛錫濟江休於晉陵又東至於姑蘇將涉震澤踰會稽上天台至國清上方而止趣靜境者不料遠近登漸門者不計歲月則上人還斯詎可知也上人之文章可得而聞也諸公將議遠別得不以斯文爲贈乎

送陳贊府兼應辟赴京序

初公讀梁竦傳始慨然薄遊恥揭其公器退而耕於楚縣

知言者以爲子真吳都禦寇圃田卜商西河與公道雖不同其操一也羿工於中微拙於使人無已譽固知大名之下天爵難讓十二載冬十月果以公才徵龍泉自惜暫隱牛斗之次美玉無脛竟爲秦人所得且晉以梁山召伯宗漢以明堂延申公尊德問禮於斯爲盛況朝廷頓八紘久矣頃來儒服立於魯人之門者公祇命台鉉將濯纓而孤矣當貞女不字十年反常及大翼怒飛知一日幾萬門離羣何贈請賓賦車乘主人賦南有嘉魚以代零雨之什

送司華自陳畱移華陰赴任序

去年春公自京兆北部尉謫掾陳畱議者或歎公大才未
光直道而黜君子則曰否患德不立不患遇坎始用舉至
是雖速謗何傷有才與時不遠而復其明年春肆大眚冢
宰量殿最厚薄以令聞遷公於華陰然後知朝廷之祿用
也華陰者左崤函右雍州潼津鐘池綴於分野長河太華
爲之襟帶甸近所以難其選地雄所以寵其秩公將以利
器刃物清機臨人吾見岑公孝不得專美於南陽大火初
落昊天欲高遠山雲開歸路秋色請各抒別操使行者得
歌而咏之